

YOUpaTUBO: il canâl YouTube in marilenghe fat dai fantats

Al è stât presentât in Regjon il progjet che al cjape dentri une “scuadre” di vot *youtubers* protagoniscj di une serie di videos su lis lôr passions

Si clame **YOUpaTUBO**: une iniziative fate dai zovins, pai zovins: vot fantats fra i 20 e i 28 agns che a contin su YouTube lis lôr passions, lis plui svariadis, ai lôr coetanis, cjapantju dentri midiant di videos là che la ironie e je l'ingredient principâl.

Intai mêss passâts la ARLeF – Agenzie Regjonâl pe Lenghe Furlane e à publicât in rêt un bant cul obietîf di cjatâ fantats che a vessin voie di contâ e di condividi i lôr interès, par furlan, ma no dome. E je nassude une piçule “scuadre” di *youtubers*. Un grup svariât par capacitâts linguistichis (no ducj, di pueste, a san fevelâ furlan in maniere perfete), etât, passions, lavôr e lûc di divignince (Fane, Tumieç, Ruvigne, Basilian, Udin, Riçûl, San Denêl), ma che in curt al è stât bon di creâ rubrichis divertentis par frontâ i temis plui diviers.

Midiant di chest **gnûf canâl YouTube** i fantats a podaran informâsi e informâ, imparâ e insegnâ, cjapâ o dâ ispirazion, ognidun cul so stîl! A son di fat propit lôr che a àn sielt i temis di tratâ e lis modalitâts par fâlu, cun chê di dâ forme e strutture a un “lûc” gnûf che par cumò al à za cualchi video, ma che al cressarà une setemane daûr di chê altre.

«Daûr di ce che al è previodût tal “Plan gjenerâl di politiche linguistiche pe lenghe furlane 2021-25”, o lavorìn par che il percors di partecipazion dai natîfs digjitâi al sedi simpri plui siôr. Lôr a son sogjets che o cjalin cun atenzion e interès particolârs, e par chest o ‘nt vin analizât lis inclinazions e lis passions», al à marcât il president de ARLeF, Eros Cisilino, in ocasion de conference stampe di presentazion dal progjet, inte sede de Regjon Friûl-V.J. a Udin. «YouTube al è dal sigûr un strument che a doprin une vore dispès. Par chest o vin decidût di meti dongje dal nestri canâl istituzionâl un altri, fat in maniere direte dai fantats bogns di dialogâ cun chei de lôr gjenerazion doprant la maniere juste e la lizerece che e covente par tratâ tematichis di interès comun. O vin volût ancje che la scuadre di youtubers e fos eterogenie, ancje tes lôr capacitâts linguistichis. YOUpaTUBO, di fat, al vûl jessi un spazi viert a ducj, sedi par cui che il furlan lu sa ben che par cui che “lu mastie” a pene. Un lûc virtuâl dulà podê imparâ e divertîsi, scuvierzi robis gnovis sul Friûl, sui furlans e sul furlan, ma là che si pues ancje zuiâ. Al è duncje un spazi ae puartade di ducj».

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Ancje i *youtubers* a son entusiascj de esperience che a son daûr a vivi! **Fabio Valvason** le viôt tant che «*un gnûf mût par scomençâ a tignîsi strente la nestre culture e soledut mostrâ ancje a chei altris trop che e je impuartante*». Le pensin cussì ancje **Mattia Cantarutti** e **Federico Iob**, cundut che no sedin «*i miôr tal fevelâ furlan, dut câs le vin calcolade simpri tant che la lenghe "di cjase" e al è duncje une vore impuartant rivâ a dâi il valôr just*». Ancje par **Diego Scarsini** «*il furlan al è un patrimoni, capîlu al è un onôr e savêlu fevelâ e je une fortune che si à di condividi*». Soredut se si pense che a fâlu a son zovins, o ben «*Il futûr. Il furlan, di fat, al à bisugne (ancje) dai zovins*». Par **Davide Buccheri** e je «*une esperience stimolante, dinamiche e buine di meti insiemi tradizion e inovazion*», ma ancje «*une biele oportunitât par mostrâ lis bielecis e lis diversitâts dal Friûl e de nestre lenghe*», cemût che al à ricuardât **Lucia Bello**. Une iniziative supuartade ancje dal supuart tecnic di professioniscj che «*al permet di vê un prodot di cualitât alte*», al à precisât **Federico Benedet**, che nol è gnûf a chest gjenar di ativitât. Infin **Francesco Colombino** al à dit di savê «*za dal imprim che al sarès stât un projet impuartant e divertent soledut pai compagns che o ai cjatât. A ogni mût, al è simpri biel contâ il propri teritori e ogni argoment al è ancjemò plui interessant se si lu fâs in lenghe furlane*».

I fantats di [YouPalTubo](#)

Lucia Bello
Federico Benedet
Davide Buccheri
Mattia Cantarutti
Francesco Colombino
Federico Iob
Diego Scarsini
Fabio Valvason

Udin, ai 25 di Zenâr dal 2022

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<